


Ivan Jansen hunto cu ganadornan di Grammy den concierto awe nochi



ORANJESTAD(AAN)-- Ivan Jansen, maestro di guitarra, awe nochi 10 'or lo presenta riba escenario hunto cu artistanan multi ganadornan di Grammy y hoben profesional local den e Caribbean Sea Jazz Festival. E proyecto/presentacion aki ta un colaboracion local y internacional bao liderazgo di Ivan, presentando artistanan manera Alex Han riba sax, Oscar Stagnaro riba bass, Alex Brown riba piano, Pernell Saturnino riba percussion, Michael Bremono riba drums y Serghio Jansen riba guitarra. Ivan lo presenta un variedad di composicion, entre otro, di su ultimo CD HORIZONTE NOBO. Ivan Jansen a establece su mes como un guitarista/compositor multi-facetico cu un concepto musical cu ta contene ideanan melodico refrescante cu harmonia y ritmonan di jazz sofisticada. Den su composicionnan e ta usa ritmo y folklore Arubano/Antiayano como su inspiracion. Su concepto di jazz ta engendra den un mezcla di tradicion di guitar contemporario, clasico, rock y latino. Ivan a presenta den varios festival internacional y ta presenta semanalmente cu su Jazz Quartet na Divi Links (Mulligans) y Divi Mega Resort. Oscar Stagnaro,

ganador di Grammy a wordo nomina varios biaha como e mihor bahista di Latin Jazz. El a contribui grandemente den e desaroyo di e concepto di bass di musica Latin Jazz. Oscar ta director musical di Paquito de Rivera. Alex Han ta un saxofonista di clase mundial, un virtuoso cu ta tour mundo cu e legendario Marcus Miller. Cu 25 anja, Alex ta reconoci kaba como un di e mhor saxofonista di mundo. Alex Brown tambe ta un pianista di jazz virtuoso. E ta toca cu madures extraordinario y tin conceptonan musical increibel. Pernell Saturnino ta entre e mihor percussionistanan di latin jazz di mundo. El a graba cu Chick Corea, Paquito de Rivera y a tour cu hopi otro artista manera Deedee Bridgewater. Tanto Oscar, Alex Brown y Pernell ta tour cu Paquito de Rivera. Serghio Jansen di Aruba ta un guitarista virtuoso hoben cu un sentido fini di melodia y tempo. Sin ningun esfuerzo e ta mezcla tecnica extraordinario cu un musicalidad impresionante pa crea solonan electrificante. Serghio a participa na festivalnan di London, Taiwan, Venezuela y den region y a tour cu bandanan den Merca. Michael Bremono di Aruba ta un drummer/percusionista talentoso y versatil, recientemente gradua di Conservatorio di Rotterdam y ya den demanda localmente y internacionalmente. Michael ta siguiendo pa su Masters na Oklahoma. E ultimo CD di Ivan Jansen "Horizonte Nobo" ta inclui tur e musiconan fabuloso aki.